

■ CONVIVENZA

Perder

DA BETTINA CADOTSCH*

In di hai jau pers in bel anè ch'jau aveva survegnì da mes geniturs sin mes 18avel anniversari. Tut desperada al hai jau tschertgà dapertut nua ch'el avess pudì ir a perder. Jau hai guardà a chasa en mintga chantun e sun er ida en il café nua ch'jau era stada lez di. Ma senza success, l'anè n'è simplamain betg vegnì n'navant. Quai era in sentiment frustrant e dischillusiunant.

Insatgi da vus savess franc raquintar ina sumeglianta istorgia. Forsa avais vus era gia pers ina chaussa ch'era custavla surtut per motivs emozionals. Per exempel in regal d'ina persuna che as stat a cor u perfin insatge che vus avais ertà. Jau pens ch'i n'emportia betg tge ch'ins perda – igl è simplamain mal'empernaivel, fa mal e ravgenta.

Cura ch'jau hai percurschì ch'jau aveva pers l'anè ha ina hectica tschiffa mai ed jau hai cumenzà a metter tut sutsura. Era sche jau aveva gia tschertgà trais giadas insanua hai jau guardà in'ulteriura giada sperond d'avair survevì avant quai ch'jau tschertgava. Era quai è in cumportament che glied ch'ha gia pers



ina giada insatge enconuscha segir.

Alura vegn il temp dals patratgs intensivs. Per exempel sun jau ma dumandada adina puspè nua che l'anè pudess pomai esser e nua ch'jau avess pudì perder el. Quai hai jau fatg fin ch'jau hai ditg a mamezza ch'jau na possia uss era betg pli midar la situaziun e ch'i na portia nagut da volver mintga crap. Quai è lura quest nausch mument ch'ins dat si la speranza che quai ch'ins ha pers cumparia puspè.

Però anc mender è stà il mument ch'jau hai ditg a mes geniturs ch'jau haja pers il bel anè. Quai era propi penibel per mai. Per fortuna han els gi chapientscha e ditg che quai possia capitar e ch'i dettia bler mender. E sche nus essan sincers – i dat simplamain

qua e là memia blers lieus nua ch'ins avess pudì perder insatge e mo in lieu nua che la chaussa è propi ida a perder. Che la probabladad da chattar ella n'è perquai betg gronda è logic. Ed era la probabladad ch'insatgi chattia per exempel in anè e giaja cun el tar la polizia vegn ad esser minimala. Cun clavs, bursas ed autras chaussas è quai (forse) pli probabel.

Tut quai ch'jau poss far uss è m'imaginar nua che l'anè pudess esser. Forsa ha ina matta chattà e salvà el? Forsa è el insanua en ina rusna e resta zuppà per adina? Forsa ha in mat chattà e regalà el a sia amia? Jau na sai betg e mettain che jau na vegn era mai a savair. Ma sch'ins chatta e salva insatge duess ins adina tegnair endament ch'i dat adina insatgi ch'è a la tschertga da quai. Forsa èn ins era sez ina giada led ch'insatgi auter fa tals patratgs sch'ins perda insatge. Sch'jau chat ina gia in anè u insatge auter giun plaun, vegn jau franc a dar giu quai. Quai hai jau definitivamain emprendì cun perder quest bel anè.

***Bettina Cadotsch è creschida si a Savognin. Ella studegia Multimedia Production a la Scuola auta da tecnica e d'economia a Cuira e lavura tar Radio Südostschweiz e «suedostschweiz.ch».**